

松石高立署

抱潤軒文集

卷十九至卷廿二

抱潤軒文集十九

桐城馬其昶通白

墓誌銘

清封光祿大夫奉天巡警道鄧君墓誌銘

丙辰

君諱嘉纘字季垂江寧鄧氏先世居吳縣洞庭山遷鳳陽再遷壽州清初有官洮岷兵備道諱旭者卜居江寧萬竹園故又爲江寧人矣兵備五傳至兩廣總督諱廷楨於君爲王父考諱爾咸安徽知縣未到官卒有子四人君其季也總督薨逝天下亂起家無贏貲君又少孤世父文愨公諱爾恆方官雲南爾頤官山西叔父爾晉官貴州君奉母廖太夫人展轉晉蜀滇黔最後兄履吉官湖南又迎養至

湘及江南平奉母歸園屋經亂皆燬賃居陋巷貧苦厲行
曾文正公督江南一夕過宅外聞書聲詢而異之命往見
歎鄧氏世有人也同治庚午以優行入貢用知縣乙亥舉
於鄉時長兄公武官福建太夫人春秋高家居君與次兄
樹人約兩人中必有一人留侍者又四年太夫人卽世終
喪始出就官貴州以才幹權貴筑令時部令嚴核賦額飭
直省造徵信冊貴筑縣綱居首糧儲道必強君取盈爲列
縣倡君不可曰是貽民無窮累也竟坐是滿歲改知貞豐
州州簡缺也又權知正安州皆有惠愛君長於斷獄機神
四徹死囚往往得更生奏調至臺灣補嘉義一以慈仁化
悍俗終三歲民不械鬪甲午之役臺灣割隸日本鬱鬱內

渡當是時安徽布政使于公蔭霖按察使趙公爾巽皆負清望察吏教士烝烝求治又銳意清田賦取朝旨調君至皖主賦事君以丈田擾累戒操切逾年兩公同時去規畫未竟而當時皖治已號爲極盛于公巡撫湖北復招君入幕武昌轂縮天下民物浩穰會拳禍作于公憂勞病甚事無巨細一諮君取決月餼才八十緡意泊如也總督張文襄公治鄂久營構宏大于公務綜名實君調濟其閒遇事尤持大體迄于公病瘥兩府無所鉏鋸擢守襄陽調武昌黃州鄖陽襄屬之宜城以徵屯田直激變民洵聚且攻城時君蒞鄖甫三日總督張公知襄民之戴君也檄赴宜城屬以兵君至不輕用武民帖然輸直遂以無事乙巳簡授

徽州府知府趙公爲奉天將軍請于朝改知錦州調奉天
強鄰逼處君謂能自治則人莫予侮益務養士息民禽巨
盜九枝手東三省改定官制署奉天巡警道未幾裁缺于
是君年六十五矣遂引疾自免金陵無田宅不克歸所謂
萬竹園者寄之夢想君家世簪紱綜物經務無所不練習
老更世變時時爲小詞以自遣著暖玉晴花館詞二卷乙
卯十二月二十六日病卒天津享年七十有一君娶鄭氏
生子邦述由翰林改官任奉天交涉使吉林民政使女適
上元張汝珣繼娶胡氏生三子邦造臨榆縣知事邦道財
政部科員邦邃二女適滿洲端錦桐城舉人方彥忱孫七
人以明年某月日葬某所來請銘予游君父子間彥忱又

吾甥也不得辭銘曰

韜精靡挫覲榮曷覲嶽嶽鄧君不以門庇有位有績實自
已致矜獄惟仁才勇具備斂是陰德是承是畀琢辭貞珉

九幽罔媿

王晉卿曰通篇如一筆寫成
隨意轉輸而造語仍自矜慎

清提督銜貴州威寧鎮總兵方君墓誌銘

丙辰

清中興與平粵寇之亂在吾縣推程忠烈功最高最先亡
其老壽從容起偏裨躋專閫遂與清爲終始者則方君心
齋也君諱致祥曾祖鯉舉人江都縣知縣祖庚布政司理
問父林昌縣學生三世皆以君貴贈振威將軍母氏皆封
一品夫人君生而沈勇有大略十餘歲天下亂起與家相
失貴州聶桂榮方領軍愛之撫爲己子教以兵謀戰術繼

隸淮軍從戰江南北常陷堅防守廬州扈城礮丸盡決衣
卸繼之卒潰圍出戰楓涇西塘被數創不卻退從忠烈攻
嘉興礮裂城十餘丈麾眾登矛洞君左肘是役也城拔而
忠烈中槍殞江南平又從勦捻德州柘園皆有績自君離
鄉井音問絕積軍功至副將其所受撫聶翁者嘗爲君娶
石氏生子矣而翁卒軍事大定乃乞假旋里尋親時母趙
太夫人猶健在其小時聘妻劉氏逾三十矣亦守貞不字
及是君歸承母命完婚焉俄奉母至山西二夫人皆從後
改官山東數十年不離親側母年八十六終初張文襄公
撫晉調君用泰西兵制練新軍補太原參將攝大同鎮總
兵山東巡撫李公秉衡又調君統標軍攝曹州鎮簡授貴

州威寧鎮總兵奏留攝兗州鎮前後駐東十餘年師所至
不爲民苦其在太原修金剛隄遏水患晉民亦歌思之夙
受知今大總統袁公民國成立以年老自劾罷居濟南卒
年七十有五乙卯八月廿日也君性任俠而事母至謹屏
聲色不近嘗被酒醉罵坐客母聞而戒之遂絕酒終身不
飲窮交故舊勺貸無節應之輒過所望金錢隨手盡亦竟
以是自困年老罷職家無田宅遂客死其幕客告人曰方
君之窮宜也嘗捕巨盜臨清賊繼累萬一不顧主計者以
往來偵捕車馬費所耗納入消冊君怒必改冊乃已其介
節如此君娶石夫人生男鏡保薦知府出後伯父劉夫人
生男午山東知縣女一適陝西知府丁念敷君卒後數月

鏡遇予京師云將歸葬乞銘銘曰

維吾與君世有姻連君歸葬母我拜于埏義俠之聲長者
之行吾心許之久矣烏乎君今瘞此終古無阨我銘以竣

姚叔節曰奇逸之趣
磊落出之聲光自倍

清故吏部侍郎張公暨配胡夫人墓誌銘 丁巳

公姓張氏諱仁黼字劭予河南固始人也曾祖馥遠扶溝
縣訓導祖惇麟父問行皆增貢生母氏吳氏趙公兄弟五
人次居長光緒二年進士授編修歷官至吏部侍郎自考
以上三世皆贈如其官公內行修備年十歲侍王母疾甚
勤既通籍平進至卿貳家無贏財以母老請告歸母歿遂
以毀卒其在官不事聲張謹於其職嘗劾崇厚出使俄羅

斯定界喪地之罪請斬之以謝天下庚子款成議稅丁口
公力陳其不可事乃寢當是時國威屢挫士大夫爭言新
政上意頗嚮之圖變法日亟公以大理卿特詔與王大臣
會議要政於朗潤園參中外之制揆厥宜否不阿不梗所
陳說能竦眾聽而刑部改法部割其聽斷權屬大理院部
院事所當分合爭議棘棘其章條多出公手或以私問曰
聞朝令將易服翦髮子若何對曰唯天子得議禮制度吾
何敢知聞者意公可撼說使隸新黨無憂貴富說者踵至
日十數輩率詖諧應之雖不能致亦不恨也世變大改制
固非得已任事者非其人使皆如公無冀於貴富一以爲
己之意持之亦何至病民喪國有今日之禍乎故公之生

不必赫赫出同列上及其歿既久乃尤令人可思者此也
公自爲編修直上書房十五年嘗出視學湖北還仍入直
遷國子監司業丁酉以鴻臚卿典試四川改奉天府丞丁
外艱庚子督辦河南團練詔赴行在授府尹轉副都御史
癸卯以兵部侍郎典試江西轉學工法三部侍郎改大理
院正卿又改吏部侍郎充經筵講官以光緒三十四年八
月卒年六十一配胡夫人精筆札繪畫有高識公官翰林
夫人躬執爨刃指血涔涔下匿不使姑聞公字之曰景桓
論者謂漢鮑宣妻未必是過家居衣不帛非令節無肉食
公清譽稱於時夫人實有以成之晚歲子瑋築室芳嘉園
稍宏壯矣夫人居之念公歿里第湫隘丙辰十月疾革命

移別室而卒年六十五瑋前葬公縣北丁家埠未有銘至是啟其阡祔焉而請予銘瑋以譯學成進士外交部僉事次子璉游學英吉利銘曰

國患法敝亦患人偷偷以矯法蠹國若讎公淬其銳抑而韜之匪我之韜彼則撓之國既剖矣公歸阜矣比德同藏銘不朽矣

王晉卿曰敘事不抗不墜而歛感歎純是絃外之音陳伯嚴曰潛氣內轉表爲冲夷之度

袁勵之墓誌銘

戊午

袁君諱世敷字勵之河南項城人也家世貴顯祖端敏公諱甲三漕運總督端敏二子長保恆刑部侍郎諡文誠次保齡道員贈內閣學士是爲君考閣學生七子而歿君次居三旣孤值寇亂家貧甚諸兄弟宦學於外獨偕少弟侍

親側且讀且治生事爲諸生再試不獲舉遂不復試事母高太夫人數十年如一日母病臂躬調護之夜必數起有孝女順婦所難勝者伯兄五弟相次殞婦嫠居君遇之曲盡恩禮營父兄葬地培先壠蒔松柏不避勞勤辛亥變起母就養天津君慕戀不得從尋又喪弟哀瘁彌年遂以丁巳春三月一日卒年四十四君於前大總統爲再從昆弟當政體革新之初袁氏熾盛幾欲化家爲國而君乃沈隱閭巷從事倫紀之間人之見之者若忘其門閥朝世聿更君遽奄化諸兄弟皆哭之痛鄉黨知舊皆唏曰善人亡矣人之思之者旣久而弗衰不益觀於前不虧譽於後傳曰惟孝友于兄弟是亦爲政君其庶幾乎於是搢紳之徒儒

林之彥上君行誼請宣史館眾無異辭子二曰克廣克鴻
弟世傳嘗位於朝矣後棄而商於君卒之七月泣請其昶
銘君墓天津嚴侍郎修有節概不撓世務顧佐之請益勤
於以見君之德之愧於人也其葬在某所銘曰

不翼而翔庸行鬱彰虧盈曷常我銘不忘萬世之藏

王晉卿曰

以君於前大總統為再從昆弟一語為題眼前後反復贊歎其沈隱閭巷從事倫紀之事帷燈匣劍妙不可言

章夫人墓誌銘

己未

夫人南昌章氏候選員外郎煥奎之女歸同邑舉人內閣
中書饒君延年以己未秋年六十卒於京寓有子二人曰
孟任翰林院編修前法制局參議充眾議院議員孟倬幣
制局僉事女子子二人均適熊孫男十人卽以其年季冬

某日卜葬新建縣厭平山之原來乞銘予初聞夫人喪往弔見中書知爲篤誠長者語夫人事容甚戚以爲代已死也中書生而善病自少時術者相其體貌當天夫人微聞之卽矢捐糜一身先殞不恨其後中書屢邁疾瀕死者數矣皆幸得全因字曰再生去歲病復劇夫人亦病猶強自支勵以衛夫疾至是遂不起夫人之初嬪也事舅昭通知府諱佩埽公十年昭通稱其知禮事姑余太淑人尤久畀以室政宥不諉難易不專成昭通友于兄弟五十同居訢訢如也夫人推所以事舅姑者以事伯姑姚節孝暨叔舅叔姑皆稱曰賢丁亥夏昭通以哭弟驟衰夫人懼陰爲之備不以告俄而疾大漸則事已夙具時七月八日也當其

疾未甚呼夫人來前曰汝祖姑姚太君敬上惠下嗇己豐人惟汝能肖似然汝雖容物自損挹矣而不能忘物姚太君固出之自然也夫人泣受教嗣是每忌日必潔治膳羞今年病不克親其役中書則晨起誦梵經冀爲夫人徼福於先靈而是日竟卒悲夫夫人病卽屏醫藥不御勅其子曰天旣息我以死吾何求哉爾善事父誨子葆爾令名任也裒倬也餒斂之振之毋忘戒慎庶其免乎夫人讀書故不多而識鑒明達服勤終世乃至彌留垂絕之頃所相與劭勉者皆士大夫克治之精言聞諸前典婦學於舅姑禮也夫人有焉固宜銘辭曰

維士厲節鮮克有終禮愆俗敝朝介暮通惛惛夫人以訓

厥子匪我之期先靈是喜兩世遺誠一本之儒勛哉孝嗣

無怠無渝

姚仲實曰敘庸德能使精神奕奕於紙上非用功深者未易臻斯詣也王晉卿曰文生情邪情

生文邪愈平澹愈濃至可謂善於敘事

四品卿銜張君墓誌銘

己未

君諱士珩字楚寶張氏其先自江西遷合肥大父純咸豐元年舉孝廉方正父紹棠以軍功至提督母李氏文忠公女弟也繼母后氏兄弟八人君少簡穆善讀書人未之奇十歲喪母悲鰥逾節文忠憐而異之弱冠寓金陵受業汪梅村先生遂通輿地辭章之學尤習兵家言沈審有意略不爲談助光緒十四年應鄉薦試禮部不第留文忠幕府居久之歸省文忠方創海軍造端宏大軍械局尤機要君